

# Las premias per las cassas da malsauns s'augmentan per 0,2%

Ils Grischuns pajan 1,5% dapli

DA LUCAS DEPLAZES / ANR

■ **La premia en media per l'assicuranza obligatoria da malsauns s'augmenta l'onn 2020 per 0,2 procent. Per il Grischun datti in augment dad 1,5%. Grondas differenzas tranter ils chantuns.** Alain Berset, il minister da la sanadad publica, ha renconuschì che las premias per las cassas da malsauns muntian ina gronda grevizza per la populaziun, principalmain per las famiglias. El ha accentuà ch'il cussegl federal haja prendi ils ultims onns diversas mesiras per franar ils custs. Quellas han uss in effect positiv sin il svilup dals custs per la sanadad. La refurma da las tariffas per il tractament medical «Tarmed» l'onn 2018 ha lubì da spargnar 500 milliuns francs. Dapi l'onn 2012 pretenda Berset sbassaments sin ils pretschs dals medicaments ch'han reduci ils custs per ina milliarda francs. Quai na tanschia dentant betg. Il cussegl federal è da l'avis ch'ulteriuras mesiras èn necessarias per franar ils custs per la sanadad. Senza talas mesiras vegnan ils custs a s'augmentar vinavant. Ils 21 d'avust 2019 ha il cussegl federal surdà al parlament in pachet propostas che prenda en responsabladad tut ils acturs sin il sector da la sanadad. In segund pachet vegn preparà per l'entschatta da l'onn proxim.

## Buna novitad

Per l'onn 2020 saja l'augment da las premias per l'emprima giada moderat, ha constatà Berset, il schef dal departament



Il minister da la sanadad publica Alain Berset responsa a las dumondas dals schurnalists.

KEYSTONE

federal da l'intern, a chaschun da la conferenza da medias dad ier a Berna. En media s'augmenta la premia da basa per la cassa da malsauns l'onn proxim per 0,2%. Il svilup dals custs per la sanadad variescha da chantun tar chantun tranter minus 1,5% e plus 2,9%. La premia media munta a 315.40 francs per mais.

Dapi l'introduziun da la lescha davart la sanadad l'onn 1996 è la premia media s'augmentada mintg'onn in tras l'auter per 3,8%. La premia media resguarda tut las premias pajadas en Svizra, repartida sin ina persuna.

En diesch chantuns èn las correcturas da las premias sut nulla, numnadain:

AG, BE, BS, LU, SH, SO, SZ, VD, ZG, ZH. En tschintg chantuns (AG, GR, NE, TI, VS) perencunter s'augmentan las premias per dapli che 1,5%. La premia media per creschids munta a 374.40 francs il mais u 0,3% dapli. La premia media per uffants da 98 francs resta sco l'onn current. Per persunas giuvnas

tranter 19 e 25 onns sa sbassa la premia per 2%. En il Grischun s'augmentan las premias per ils creschids per 1,8%, per ils uffants plus 1,3%. Ils giuvens tranter 19 e 25 onns pon quintar cun in sbassament da las premias da 0,2%.

## Repartiziun dals custs

Sin fundament dals custs per la sanadad da 32,6 milliardas francs l'onn 2018 sa repartan ils custs sco suonda: Medis da chasa (ambulant) 23% = 7,4 mia., ospitals staziunar 20% = 6,6 mia., medicaments 22% = 7 mia., ospital ambulant (senza star sur notg) 14% = 4,4 mia., chasas da tgira 5% = 1,7 mia. ulteriuras prestaziuns 16%.

## Infurmaziun

Las cassas da malsauns ston communitgar las novas premias als singuls commembers fin ils 31 d'october 2019. Ils assicurads pon lura desdir il contract ed eleger in'otra cassa da malsauns u far midadas fin il 30 da november 2019. Mintga cassa è obligada da prender si scadina persuna en l'assicuranza da basa obligatoria (Grundversicherung). Per che la desdida saja valaba ston ins aschuntar a la dumonda da midada in confirmaziun.

Sin «www.priminfo.ch» stat a disposiziun da la publicitad in sistem per la calculaziun da las singulas premias. L'Uffizi federal da la sanadad ha installà ina lingua speziala per tgi ch'ha dumondas davart l'assicuranza da malsauns (058 464 88 01).